

Leitbild Kirrweiler

Wer simmer  un was wemmer sei 

Traditionell de Woibau un nocherd noch de Woitourismus präächen unser Läwe un unser Gemää. Mit unsere iwwerdiemaße Woibaufläch simmer sogar bundesweid äänie vun de greesche Woibaugemääne. Ned wohr.

Mer sin gadding mit unserm schääne Pälzer Lännel, un äwesemer mit allem was uns do hischdorisch, kuldurell, un vun de Nadur ringsum gäwwe isch.

Mer waren emol die Summerresidenz vun de Speyremer Färschtbischeff. Un dodruff simmer stolz. Iwwerhaupt simmer arich stolz uff unser Ortsgschicht.

Mer sin die Häämet von traditionsbewuschde un ongaschierte Bircher.

Mer sin en beliebde Wohnort in enre zentrale Laach. Unser Gemää hot e gudie Infraschdrukdur un es is do ach ebbes gebodde fer Kuldur- un Freizeit.

Wichdich iss uns e noochhaldichie Ortsentwicklung. Weil des die Grundlaach ach bilde dut, fer die Zukunft vun unsere Kinner un folchende Generatione.

Mer achten und schätzen unser schäänie Londschaft. Daß do die Nadur un die Umwelt intakt sin, des is uns wichdich. Mit dreizeh Londschaftsschutzgebiete traachen mer jetztert schon emol dodezu bei.

Mit Begeischerung speele mehr Theater. Dodemit präche mer un entwickeln unser Kirrweiler als des Theaterdorf. Awer jo, des ich so.

Mer „Kerrweiler Brierer“ sin läwensfrohe Leit. Was uns noch auszeichne dut, des sin Offenheit, Freundlichkeit un unser Hilfsbereitschaft. Des Ehreamt hot in unsere Gemää en hohe Stelwert.

Mer hänn sowohl s´ Geschdriche - die hischdorisch gewachsene Schdrukdure - als ach die Zukunft vun unserm Winzerdorf fescht im Blick.

Die Idendidät vun unserm Ort is verbunne mit em Woibau, und der iss halt ach en wichdiche Wertschafffaktor.

Kirrweiler iss schdaatlich anerkannt als en Fremdeverkehrsart in de Palz.

Mer lechen Wert uff en Tourismus wu zu uns basse dut, wu umweltverträglich un noochhaldich ich.

Daß unser Gemää so en hohe Wohnwert hot, licht an dere intakte Londschaft, am ginschdiche Klima, an de zentrale Laach, un daß es bei uns Agebode gäbt fer die Naherholung.

Die nadurnahe Läwensräum´ sin en Guddääl ach vun dem, was unsern Ort so wertvoll macht.

Unser Gewärwetreibende, als en wichdiche Bestanddääl vum Ganze, leischden en wichdiche Beitraach, daß sich unser Gemää so positiv entwickele dut.

Unser zahlreiche, vielfäldiche Vereine duen unser Gemää mit ehre Aktividäde bereichere.

Unser Mariekapell un die katholisch Parrkerch prächen als Wahrzeiche des hiesiche Ortsbild.

Mer sin e dünamischie, leischdungsstarkie Gemää mit noch weidere gude Entwicklungschance im Woibau, Wohne, Schaffe, Kuldur und Tourismus.

De gonzheidliche A(n)satz setzt sich fort in unserm Denke und Hanne un er umfasst alle Läwensbereiche, wie z.B. Energie, Erziehung oder Ernährung (un was mer nid essen, des trinke mer...)

Ruh un Erholung sin die zwää wesentliche Wohlfühlfaktore vun Kirrweiler.

Unser Kuldurlandschaft is besunnersch schützenswert.

Die Nadur is en nit wegzudenkender, wertvoller Bestanddääl vun unserm Ort.

Mer frään uns iwwer unser Partnerschafte mit Kirrweiler im Landkreis Kusel, Kirrweiler im Elsaß und Kirviller in Lothringen.